

REGIONAL NEWS UNIT
ALL INDIA RADIO, AGARTALA
Date: 23-02-2018
Time: 07:55-08:05 PM Hrs
BENGALI EVENING BULLETIN

Headlines:

- (১) নির্বাচন কমিশন আগামী ২৬শে ফেব্রুয়ারী রাজ্যের ৬টি বিধানসভা কেন্দ্রে মোট ৬টি ভোটকেন্দ্রে পুনরায় ভোট গ্রহণের নির্দেশ দিয়েছে।
- (২) ADC'র একদিনের অধিবেশন অনুষ্ঠিত।
- (৩) প্রধানমন্ত্রী নরেন্দ্র মোদি বলেছেন, রাজনৈতিক উদ্দেশ্যে এবং বিচ্ছিন্নতাবাদকে উৎসাহ প্রদানের জন্য ধর্মকে ব্যবহারকারীদের প্রশ্রয় দেয়া উচিত নয়।

বি-পোল :

নির্বাচন কমিশন আগামী ২৬শে ফেব্রুয়ারী রাজ্যের ৬টি বিধানসভা কেন্দ্রের মোট ৬টি ভোটকেন্দ্রে পুনরায় ভোট গ্রহণের নির্দেশ দিয়েছে। ভোটকেন্দ্রগুলি হল সোনামুড়া বিধানসভা কেন্দ্রের ২৬, রাজঘাট উচ্চ বুনিয়াদী বিদ্যালয়ের-উত্তরাংশ, ধনপুর বিধানসভা কেন্দ্রের ৮, তেলকাজলা এইচ এস স্কুলের উত্তর পশ্চিমাংশ, তেলিয়ামুড়া বিধানসভা কেন্দ্রের ৪৫, বিবেকানন্দ দ্বাদশ শ্রেণী বিদ্যালয়, সাক্রম বিধানসভা কেন্দ্রের ৪৮, লুধুয়া হাইস্কুল পূর্বাংশ, অম্পিনগর বিধানসভা কেন্দ্রের ৩৭, মান্দাইবাড়ি এস বি

স্কুল ও কদমতলা-কুর্তি বিধানসভা কেন্দ্রের ৯, পিয়ারাছড়া টি এস্টেট হাইস্কুল। ২৬ শে ফেব্রুয়ারী এই ছয়টি ভোটকেন্দ্রে সকাল ৭টা থেকে বিকেল ৪টা পর্যন্ত ভোট গ্রহণ করা হবে। পুনরায় ভোট গ্রহণের এই নির্দেশিকা নির্বাচন কমিশন থেকে গতকাল রাজ্যের মুখ্য নির্বাচনী আধিকারিকের কাছে পাঠানো হয়েছে।

নির্দেশিকায় বলা হয়, কমিশনের নিয়মানুযায়ী মকপোল এর সময় কন্ট্রোল ইউনিটে কিছু নমুনা ভোট দেয়া হয়। পরে কন্ট্রোল ইউনিট থেকে নমুনা ভোট গুলি মুছে দিতে হয়। কিন্তু ৭টি ভোট কেন্দ্রের প্রিসাইডিং অফিসারগণ মক পোল'এর সময় সংগৃহীত ভোট নমুনা ভোট কন্ট্রোল ইউনিট থেকে বাদ দেননি। এই সাতটি ভোট কেন্দ্রে পুনরায় ভোট গ্রহণের কোনো প্রয়োজন নেই, তবে গণনার সময় ভিভিপ্যাট স্লিপ গুলি গণনা করতে হবে বলে কমিশনের নির্দেশিকায় উল্লেখ করা হয়েছে। ভোট কেন্দ্র গুলি হলো বনমালিপুর বিধানসভা কেন্দ্রের ৩, এ এম সি ওয়ার্ড অফিস-তেইশ'এর উত্তর পশ্চিমাংশ, আশারামবাড়ি বিধানসভা কেন্দ্রের ৩৫, পশ্চিম রাজনগর হাইস্কুল-দক্ষিণ পশ্চিমাংশ, শান্তিরবাজার বিধানসভা কেন্দ্রের আশ্রম কলোনি জে বি স্কুল, সাক্রম বিধানসভা কেন্দ্রের কৃষ্ণনগর এস বি স্কুল। করবুক বিধানসভা কেন্দ্রের ৮ ছাইলামগ পাড়া এস বি স্কুল। রাইমাভ্যালি বিধানসভা কেন্দ্রের ৪৪ বিশ্বকর্মা পাড়া এস বি স্কুল ও করমছড়া বিধানসভা কেন্দ্রের ৩০ মনুঘাট ডি এস বিদ্যালয়।

কমিশনের নির্দেশিকায় আরো উল্লেখ করা হয় যে, ৪টি ভোটকেন্দ্রে মোট ভোটের ও ভোটের ব্যবধান চিহ্নিত হয়েছে। ফলে এই ভোটকেন্দ্রগুলিতে কোন প্রার্থী যদি এক ভোটের ব্যবধানে জয়ী হন তবে নির্বাচন কমিশনের অনুমোদন ছাড়া সংশ্লিষ্ট রিটার্নিং অফিসারগণ ফলাফল ঘোষণা করতে পারবেন না বলে নির্দেশিকায় উল্লেখ করা হয়। এই ভোট কেন্দ্রগুলি

কাকড়াবন-শালগড়া বিধানসভা কেন্দ্রের ২৩, এক্সিকিউটিভ ইঞ্জিনিয়ার, ওয়াটার রিসোর্স অফিসের দক্ষিণ মির্জাপুর ডিভিশন নং চার'এর ভোটকেন্দ্র, শান্তিরবাজার বিধানসভা কেন্দ্রে ১৯, দুর্গারাই মগবাড়ি জে বি স্কুল পশ্চিমাংশ, জোলাইবাড়ি কেন্দ্রের ৩, পশ্চিম চরকছাই পঞ্চায়েত অফিস।

ADC-অধিবেশন :

আজ বেলা ১২টায় খুমলুংস্থিত কৃষি প্রধান আধিকারিক ভবনের মিলনায়তনে অধিবেশন বসে। আজ ADC'র অধিবেশনে বক্তব্য রাখতে গিয়ে মুখ্য নির্বাহী সদস্য রাধা চরণ দেববর্মা সর্বত্র শান্তি-সম্প্রীতি বজায় রাখার জন্য সকলের প্রতি আহ্বান জানান। তিনি সদ্য সমাপ্ত বিধানসভা নির্বাচন শান্তিপূর্ণ ভাবে অতিবাহিত হওয়ায় নির্বাচক মন্ডলীকে ধন্যবাদ জ্ঞাপন করেন। গোটা দেশের মধ্যে রাজ্যের মানুষ বেশি ভোট প্রদান করে দৃষ্টান্ত স্থাপন করেছে বলে তিনি মন্তব্য করেন। আজ ADC'র অধিবেশনে রাজ্য এবং দেশের প্রয়াত বিশিষ্ট ব্যক্তিদের প্রতি শ্রদ্ধা জানিয়ে ১ মিনিট নিরবতা পালন করা হয়। যাদের শ্রদ্ধা জানানো হয়েছে, তারা হলেন প্রাক্তন এম ডি সি রাজ কুমার চৌধুরী, প্রাক্তন সাংসদ খগেন দাস, প্রাক্তন বিধায়ক কালী কুমার দেববর্মা, প্রাক্তন বিধায়ক রমেন্দ্র নারায়ন দেববর্মা এবং পশ্চিমবঙ্গের প্রাক্তন মন্ত্রী মহম্মদ আমিন। শোকসভা থেকে শক সন্তুষ্ট পরিবার পরিজনদের প্রতি গভীর সমবেদনা জানানো হয়। সভায় শক প্রস্তাব পাঠ করেন চেয়ারম্যান ড. রনজিৎ দেববর্মা। পরে, ADC'র অধিবেশন অনির্দিষ্টকালের জন্য মূলতবী ঘোষণা করেন চেয়ারম্যান ড. রনজিৎ দেববর্মা।

প্রধান বিচারপতি :

আগামী পয়লা মার্চ ত্রিপুরা হাইকোর্টের প্রধান বিচারপতি হিসেবে শপথ গ্রহণ করবেন বিচারপতি অজয় রাস্তোগী। ঐদিন রাজভবনে রাজ্যপাল তথাগত রায় প্রধান বিচারপতিকে শপথ বাক্য পাঠ করাবেন। বর্তমান প্রধান বিচারপতি টি. ভাইফেই আগামী ২৮শে ফেব্রুয়ারী অবসরে চলে যাবেন।

প্রধানমন্ত্রী :

প্রধানমন্ত্রী নরেন্দ্র মোদি বলেছেন, রাজনৈতিক উদ্দেশ্যে এবং বিচ্ছিন্নতাবাদকে উৎসাহ প্রদানের জন্য ধর্মকে ব্যবহারকারীদের প্রশ্রয় দেয়া উচিত নয়। কানাডার প্রধানমন্ত্রী জাস্টিন ট্রুডোর সঙ্গে প্রতিনিধি স্তরীয় আলোচনার পর যৌথ সাংবাদিক সম্মেলনে শ্রী মোদি বলেন, একতা ও অখন্ডতাকে চ্যালেঞ্জকারী শক্তিকে সহ্য করা হবে না। তিনি বলেন, সন্ত্রাসবাদ ও উগ্রপন্থা সবদেশের জন্যই বিপজ্জনক এবং যৌথভাবে এর মোকাবেলা করা প্রয়োজন। তিনি আরো বলেন, ভারত কানাডার সঙ্গে অংশীদারিত্ব মজবুত করতে চায়। কানাডার প্রধানমন্ত্রী বলেন, তার দেশ সন্ত্রাসবাদের বিরুদ্ধে লড়াই করতে প্রতিশ্রুতিবদ্ধ। তিনি বলেন, ভারত ও কানাডার ঐতিহাসিক সম্পর্ক রয়েছে এবং উভয়দেশেই বহুস্ববাদ এবং বৈচিত্র্যের সমান মূল্য রয়েছে। তিনি দু'দেশের জনগণের মধ্যে সম্পর্ক মজবুত করার উপরও জোর দেন।

ভারত ও কানাডা ক্রীড়া, শিক্ষা, বিজ্ঞান ও প্রযুক্তিসহ বিভিন্ন ক্ষেত্রে ২টি চুক্তি স্বাক্ষর করেছে। এর আগে পররাষ্ট্রমন্ত্রী সুশমা স্বরাজ শ্রী ট্রুডোর সঙ্গে সাক্ষাৎ করেন। শ্রী ট্রুডোকে আজ রাষ্ট্রপতি ভবনে প্রথাগতভাবে স্বাগত জানানো হয়। তিনি আজ রাজঘাটে গিয়ে জাতির জনক মহাত্মা গান্ধীর

সমাধিতে পুষ্পার্ঘ্য অর্পন করেন। শ্রী টুডো আজ রাষ্ট্রপতি ভবনে রাষ্ট্রপতি রামনাথ কোবিন্দের সঙ্গে সাক্ষাৎ করেন। কানাডার প্রধানমন্ত্রীকে স্বাগত জানিয়ে রাষ্ট্রপতি বলেন, ভারত কানাডার সঙ্গে তার সম্পর্ককে গুরুত্ব দেয়। তিনি বলেন, ভারত কানাডা আন্তর্জাতিক অংশীদারিত্বের যথেষ্ট গুরুত্ব রয়েছে। তিনি বলেন, দু'দেশের দ্বি-পাক্ষিক বাণিজ্য বৃদ্ধির দিকে নজর দেয়া উচিত।

নাগাল্যান্ড :

নাগাল্যান্ড বিধানসভা নির্বাচনের জন্য প্রচার পর্ব প্রায় শেষের দিকে। নির্বাচনের আর মাত্র তিনদিন বাকি। রবিবার সরব প্রচার শেষ হবে। রাজ্যের প্রত্যন্ত অঞ্চলে বসবাসকারীরা যাতে বিভিন্ন রাজনৈতিক দলের নীতি ও কাজকর্ম বিষয়ে অবগত হতে পারেন, সেজন্য কোহিমাতে আকাশবাণী ও অন্যান্য মিডিয়া এজেন্সীর মাধ্যমেও প্রচার চালানো হচ্ছে।

মেঘালয় :

মেঘালোয়েও ২৭শে ফেব্রুয়ারী অনুষ্ঠিত বিধানসভা নির্বাচনের বিষয়ে ভোটারদের সচেতন করতে নির্বাচন কমিশন বেশ কিছু পদক্ষেপ গ্রহণ করেছে। মুখ্য নির্বাচন আধিকারিক এফ. আর. খারকোনগোর জানিয়েছেন, আগামীকাল 'Rock the vote with your vote' কর্মসূচীর আয়োজন করা হয়েছে। এই সাংস্কৃতিক কার্যক্রমের উদ্দেশ্য হল – শক্তিশালী গণতন্ত্রের জন্য নিজের ভোটাধিকার প্রয়োগের বিষয়ে জনগণকে সচেতন করা।

NEET :

স্বাস্থ্য মন্ত্রক থেকে স্পষ্ট করে জানানো হয়েছে যে, যারা ২০১৮ সালের মে মাসে বা তার পরে বিদেশ থেকে মেডিক্যাল ডিগ্রী নিতে ইচ্ছুক, তাদের অবশ্যই National Eligibility cum Entrance Test, NEET উত্তীর্ণ হতে হবে। যেসব শিক্ষার্থীরা ভারতীয় চিকিৎসা পরিষদ বা MCI থেকে যোগ্যতার প্রমাণপত্র নিয়ে ইতিমধ্যেই বর্তমান নিয়ম অনুযায়ী প্রাথমিক চিকিৎসা কোর্সে ভর্তি হয়েছেন, তারা নতুন নিম্নের আওতার বাইরে থাকবেন।

বিজেপি-উনকোটি :

রাজ্যের সর্বত্র শান্তি-সম্প্রীতি ও সৌহার্দ্যপূর্ণ পরিবেশ রক্ষার উপর গুরুত্বারোপ করেছেন, বিজেপি রাজ্য সভাপতি বিপ্লব কুমার দেব। আজ বিকালে উনকোটি জেলার কুমারঘাটে আহত এক সাংবাদিক সম্মেলনে তিনি বক্তব্য রাখছিলেন। তিনি অভিযোগ করেন, রাজ্যের নানাস্থানেই সি.পি.আই.(এম) হামলা-হুজুতি করছে এবং গন্ডগোল সৃষ্টির অপচেষ্টা করছে। তিনি এসব অপকর্ম না করার জন্য আহ্বান জানান। আজকের সাংবাদিক সম্মেলনে বিজেপি'র উত্তর জেলার সভাপতি ভবতোষ দাস ও উনকোটি জেলার সভাপতি রঞ্জন সিংহ প্রমুখ উপস্থিত ছিলেন। এদিকে, বিজেপি রাজ্য সভাপতি বিপ্লব কুমার দেব আজ কুমারঘাটে উত্তর ত্রিপুরা ও উনকোটি জেলার দলীয় প্রতিদ্বন্দ্বী প্রার্থী ও কর্মকর্তাদের নিয়ে বৈঠক করেন।

শিশুমেলা :

উনকোটি জেলার ফটিকরায় স্কুলমাঠে আজ থেকে শুরু হয়েছে চারদিনের ‘শিশুমেলা-২০১৮’। সামাজিক সংস্থা ‘হৃদয় ওয়েলফেয়ার সোসাইটি’ নবম বারের মতো এই শিশুমেলার আয়োজন করেছে। আজ বিকালে শিশুমেলার উদ্বোধন করেন, অবসরপ্রাপ্ত বিদ্যালয় শিক্ষা অধিকর্তা রঞ্জিত কুমার দেবনাথ। উদ্বোধকের ভাষণে তিনি বলেন, প্রত্যেক দেশেই শিশুরাই হচ্ছে ‘রাষ্ট্রীয় সম্পদ’। শিশুদের ভালো ভাবে বেড়ে ও বেঁচে ওঠার উপযোগী পরিবেশ রক্ষার উপর তিনি গুরুত্ব আরোপ করেন। অন্যান্যদের মধ্যে ফটিকরায় আশ্বেদকর কলেজের ভারপ্রাপ্ত অধ্যক্ষ ডক্টর সুরত শর্মা, বিশিষ্ট শিক্ষাব্রতী কল্যাণ পুরকায়স্থ, এস.ডি.এফ.ও ভিনসেন্ট দেববর্মা প্রমুখ ভাষণ দেন। চারদিনের মেলায় থাকছে সাংস্কৃতিক অনুষ্ঠান বিনোদনমূলক খেলাধুলা, মার্শাল আর্ট ইত্যাদি। শিশুমেলা উপলক্ষ্যে প্রাক-উদ্বোধনী অনুষ্ঠানে শিশু রেলীও অনুষ্ঠিত হয়েছে।

বোমা :

রানীরবাজারের কাউয়াবাড়ি এলাকার জনৈক চন্দ্র কিশোর দেবনাথের বাড়ির কাছে আজ সকালে বালুর স্তূপের মধ্যে একটি বোমা পাওয়া গেছে। পুলিশ ঘটনাস্থল থেকে বোমাটি উদ্ধার করে নিষ্ক্রিয় করে।

হত্যা :

উত্তরজেলার পেঁচারথলের লক্ষ্মীপুর এলাকায় এক পারিবারিক ঝগড়াকে কেন্দ্র করে গতকাল রাতে গীতানি চাকমা নামে এক মহিলার মৃত্যু হয়। এই

ঘটনায় যুক্ত থাকার অভিযোগে পুলিশ আজ তিন ব্যক্তিকে গ্রেপ্তার করেছে।
ধূতরা হলো জয়তী বসু চাকমা, জয়তার চাকমা এবং সুনির্মল চাকমা।

ধনুষ :

দেশে তৈরী ধনুষ মিসাইলের আজ সফল পরীক্ষা করা হয়। আজ সকালে উড়িষ্যার পারাদীপ বন্দরে এর সফল উৎক্ষেপন করা হয়। এটি পৃথ্বী-১১ মিসাইলের নোসেনা সংস্করণ। এই মিসাইল সাড়ে তিনশো কিলোমিটার দূরত্বের লক্ষ্য বস্তুতে আঘাত হানতে সক্ষম। নোসেনার জাহাজ থেকে ভূমিতে এটিকে সাফল্যের সঙ্গে উৎক্ষেপন করা হয়। ২০১৫ সালের পর এটি ধনুষের দ্বিতীয় পরীক্ষা। এখন এই মিসাইল ভূমি থেকে ভূমিতে বা সমুদ্র থেকে ভূমিতে লক্ষ্য ভেদের জন্য প্রস্তুত।

টি আও ফুটবল :

ডা. টি আও ফুটবলের আসরে ত্রিপুরা আগামীকাল গ্রুপের প্রথম ম্যাচে মেঘালয়ের মুখোমুখি হবে। গুয়াহাটিতে এই ম্যাচটি হবে। রাজ্যদলটি আজ বেশ কিছুটা সময় অনুশীলন করে। রাজ্যদলের গ্রুপে ওপর দলটি হল সিকিম।

মহিলা ক্রিকেট :

অনুর্ধ্ব ২৩ বছরের পূর্বাঞ্চলের মহিলা ক্রিকেটের আসরের প্রথম খেলায় ত্রিপুরা পরাজিত হয়েছে। কলকাতার ইডেন উদ্যানে আজ অনুষ্ঠিত খেলায়

বাংলা ৬ উইকেট রাজ্যদলকে হারায়। টসে হেরে ব্যাট করতে নেমে রাজ্যদল ৫০ ওভারে ৮ উইকেটে ১১৯ রান করে। দলের পক্ষে ঝুমকি দেবনাথ ৪৮ ও শিউলী চক্রবর্তী ২২ রান করে। বাংলার এস. আইচ ১৯ রানে ৪টি উইকেট পায়। জবাবে খেলতে নেমে বাংলা ৩৩ ওভার ৩ বল-এ ৪ উইকেট হারিয়ে জয় পায়। প্রতিভা ৩৭ ও তনুশ্রী সরকার ৩১ রান করে। রাজ্যদলের মামন রবিদাস ২২ রানে ২টি উইকেট পায়।

আবহাওয়া :

আগামীকাল আকাশ পরিষ্কার থাকবে। সকালে সামান্য কুয়াশা পড়বে। তাপমাত্রা সর্বোচ্চ ৩২ ডিগ্রী সেলসিয়াস এবং সর্বনিম্ন ১৭ ডিগ্রী সেলসিয়াসের কাছাকাছি থাকবে। আজ দিনের তাপমাত্রা ছিল সর্বোচ্চ ৩২ ডিগ্রী সেলসিয়াস এবং সর্বনিম্ন ১৮.২ ডিগ্রী সেলসিয়াস।
